

DIS LITTERA

Domat, ils 6 da november 2022
Communicaziun a las medias

Embargo enfin las 16.00h

Flurina Badel gudogna il Premi Term Bel sco era il premi dal public

31avels Dis da litteratura

Ils 31avels Dis da litteratura cun il motto notg han gì dapli che 350 visitadras e visitaders. Tranter 60 e 120 personas han mintgamai visità ils 20 puncts da program. Durant ils trais dis han sa preschentads sin il palc radund 50 auturas ed auturs, moderaturas, fotografas, musicistas, linguists, edituras, redacturs e criticras da litteratura.

Ils Dis da litteratura han cumenzà il venderdi saira cun ina performance litterara da l'autur Michael Fehr suandada dad in concert da la band *ladunna* che ha animà las audituras ed ils auditurs da levar en pè e da sautar viaden en la notg e cun quai er en ils Dis da litteratura.

La sonda e dumengia è vegnì prelegì, commentà, discutà, crititgà, sunà e chantà en la halla Tircal a Domat. Quest onn hai era dà in program spezial da notg. In dals puncts culminants èn stadas las istorgettas da ~~bun~~notg da sonda saira, scrittas e prelegidas da Benedetto Vigne, Barla Coluccello, Göri Klainguti, Asa S. Hendry e Jürg Gautschi. Lur texts ans han manads tras la notg, en ils siemis ed en las regurdanzas, han dentant era tematisà la dimensiun politica da la notg. Els han per exempel laschà persequitar la notg fatala da Jan, in giuven activist per il clima, ed han mussà che la notg po era daventar in spazi da privel per personas queeras e nonbinaras.

En pli han giu lieu als Dis da litteratura gist trais vernissaschas: la sonda è vegnida preschentada la nova ediziun da la chasa editura éditions d'en bas «Aruè», deditgada a la poesia da l'Engiadina Bassa e da la Val Müstair. Dumengia avant mezdi ha la Chasa Paterna preschentà sia 140avla ediziun cun texts curts puters. En pli ha l'editura Mevina Puorger discutà cun Leo Condrau davart ses nov cudesch da fotografias «ir – per turnar».

Il Premi Term Bel ha tegnì la tensiun davent da la prelecziun dals tschintg texts nominads sur la discussiun da la giuria enfin al punct final dals Dis da litteratura. La giuria ed il public han omadus decis ch'il text da Flurina Badel ha persvadì cun sia lingua poetica e sias associaziuns expressivas. L'autura survegn il Premi Term Bel dotà cun 3000.- francs sco er il premi dal public dotà cun 1500.- francs che vegnan sponsurads da la Vischnanca burgaisa Domat.

Per ina atmosfera nocturna han era procurà ils maletgs da Mayk Wendt en il foyer sco era las moderaziuns spiertusas dad Anna Serarda Campell.

Ils 32avels Dis da litteratura han lieu dals 3 enfin ils 5 da november 2023.

Cun cordials salids dals Dis da litteratura

Laura Pfister

pfister@disdalitteratura.ch

+41 79 174 95 57